

Itsas-Geroa Gasteizko arrantza arduradunekin bilduko da

L.F. / BAIONA

Itsas Geroa taldeko ordezkari bat aurki bilduko da sare pelagikoen aurkako mozioa aurkezteko Eusko Jaurlaritzako Arrantza arduradunari. Iparraldeko lau ordezkari eta Hegoaldeko beste lau osatuko dute delegazioa beraien iritzia emateko arrantza mota honi buruz. Hots, Ondarroako eta Pasaiako arrantzaleek eskaturik batez ere, Gasteizko Gobernuak abiatu du inkesta sare pelagikoekin egindako arrantzaren ondorio ekonomikoak aztertzeko.

«Beharrezkotzat jo dugu gure iritzia ematea, batez ere ikusiz zer ondorio latzak ekarriko dituen arrantza mota honek Ipar Euskal Herrira», esan zuen Itsas Geroako ordezkari batek, fermuki salatuz sare pelagiko edo bolantekin egindako arrantza. «Zorituraz 15 urtetan astia izan dugu ohartzeko pelagikoekin dena zilipurdika joan zela arrantza munduan eta besteek ez dute huts hori egin behar» gehitu zuen, azpimarratuz mozioa aurkeztuko diotela Gobernuari ez dezan urratsarik eman bide horretan.

ELak Remsa salatu du ordezkari bat kaleratzeagatik

N.A. / IRUÑA

Nafarroako ELA sindikatuak Mutiloa-Taxoaren dagoen Remsa enpresaren jokaera salatu zuen atzo ohar baten bitartez. Sindikatuak adierazi zuenez, «enpresak ekintza sindikalen jazarpena egiten du». Izan ere, ELAko ordezkari sindikala kaleratu berri dute, lau urte t'erdia lantokian aritu ondoren.

Sindikatuak jakinarazi zuenez, «kaleratutako langilea ELAko ordezkari sindikala izanik, lantokiko egoera salatzen nahiz eskakizunak egiten zituen; hori dela-eta kaleratu dute». Era berean, Remsako 110 langile zuzenetatik 32 soilik behin-betikoak direla salatu zuen ELAk; bere ustez, «langileetatik % 71 behin-behinekoak izanda, ordezkari sindikalak enbarazu egiten zion enpresari».

Espainiako Bankuak dio inflazioa % 3,5-%4koa izango dela 1996rako

Soldata igoerak bilakaera positiboa eragotziko duela ohartarazi du

Espainiako Bankuaren ustez, 1996ko lehenengo hilabeteetan inflazio tasa % 3,5a eta % 4a bitartean kokatuko da. Azken hilabeteetan prezioak gorantz bultzatzen zituzten «presioak» desagertu egin dira, eta horrek inflazioaren bilakaeraren joerari buruz aurrikuspen onak eragin ditu.


MADRIL

Espainiako Bankuak inflazioari buruz sei hilabetero egin ohi duen txostenaren azken aleak dioenez, ordea, ekonomiaren inguruan dauden «zalantza handiek» baldintzatu egin dezakete baikortasun hori, eta 1997an % 3kora jaistea zailagoa izango dela dio.

Urte hasieratik hona Espainiako banku zentralaren politika monetarioa baldintzatu duten faktoreen eragina moteldu egin dela azpimarratu du entitateak: BEZaren igoeraren eragina espero baino arinagoa izan da, pezetaren balio gutxitzeak ere ondorio mugatuak izan ditu, industria eta nekazaritzako prezioen igoera apaldu egin da, eta lehenagaien nahiz petrolioaren salneurriak egonkor daude.

Horri esker, iragan maiatzetik inflazioaren igoera ere moteldu egin da, 1994ko udatik zekarren joera berreskuratzuz. Gainera, joera horrek aurrerantzean jarraituko duela pentsarazten duten faktoreak badirela azpimarratu dute txostenek.

Faktore horien artean hazkunde eredu aipatzen du banku zentralak. Hazkunde horren oinarriak barne eskariaren % 3ko igoera, eta Barne Produktu Gor-



dinaren % 3,5eko igoera dira. Bi faktore horiek «ez dute presio handirik egingo prezioak igoarazteko».

Txostenaren arabera, kontsumo pribatua zuzpertzera posible bada ere, hazkundearen oinarriak inbertsioak eta esportazioak izango dira aurrerantzean ere.

SOLDATA ETA GESTU PUBLIKOA

Hala ere, «inflazioaren jokaera positibo hori oztopatu eta prezioen egonkortasunaren helburua eragotz dezaketen arrisku handiak daude inguru ekonomikoan», ohartarazi du Espainiako Bankuak.

Arrisku horien artean negoziazio kolektiboa eta gastu publikoa aipatzen ditu txostenek. Bi kontu horiek 1996-97ko epean zalantza gehien sortuko dutenak omen dira.

Lehenengo faktoreari buruz, Espainiako bankuak uste du soldatek gorakada handia izango dutela urtearen bukaeran eta 1996aren hasieran, batez ere

kontuan hartuz inflazioa abenduan % 3,5eko helburua ofiziala gaindituko duela. Soldata igoera finkatzeko oinarria inflazioa izan ohi dela gogoratu behar da. Horretaz, Gobernuak dagoeneko aitortu du urtearen bukaerako tasa % 4,3koa izango dela.

Horrekin batera, eta egoera ekonomiko egokiaren ondorioz, lan hitzarmenetan jasoko diren igoerak handiagoak izango dira. «Soldaten igoera horrek eta produktibitatearen hobekuntza txikiak lan kostuen hazkundera ekarriko dute. Hori enplegua sortzeko kaltegarria izango da, eta gainera prezioen gaineko presio handiagoa ekarriko du», dio txostenek.

Bigarren faktoreari dagokionez, Espainiako Bankuak beharrezkotzat jo ditu egitura erreformak egitea ordainketa publikoak murrizteko. Murrizketa horiek aurrekontuetako atal malguenetan ezezik —soldatetan, subentzioetan, inbertsioetan— ordainketa finkoetan ere egin behar dela dio entitateak.

Teknologia trukatu dute Europako eta EEBBetako 'software' erakundeek

ZAMUDIO

Europako Software Institutuak (ESI) eta Estatu Batuetako Software Engineering Institutek elkarlanerako akordioa sinatu zuten atzo, Zamudioko (Bizkaia) Teknologi Parkean. Akordioaren arabera, munduan dauden mota honetako bi erakunde bakarrek teknologia trukatu dute.

Pittsburgh-en kokatuta dagoen erakunde amerikarreko buruak eta Zamudioko Parkean dagoen institutuko arduradunak azken horretan bildu ziren atzo goizean hitzarmena sinatzeko. Gunter R. Koch ESIko lehendakariaren arabera, «akordioak argi uzten du bi erakundeak ez di-

rela elkarren aurka lehiatzen». Ildo honetan, bakoitza arlo baten espezializatzea eta ondoren lanak trukatzearen alde agertu zen.

Watts Humphrey EEBBetako institutuko ordezkariak azpimarratu zuenez, «orain mundura zabaltzeko prest gaude». Europako Batasunean «software arloan lan ona egin eta gero» harremanak estutzeko «une egokia» dela deritzo.

CMM SISTEMAREN ORDEZKARI EUROPARRA

Sinatutako hitzarmenaren arabera, institutu bakoitzak lan bat merkaturatu aurretik besteari igortzeko konpromezua hartu du. Era berean, institutu ameri-

karrak Europan edukiko duen agente bakarra izango da ESI. Horrela, Estatu Batuetan garatutako Capability Maturity Model (CMM) metodologiaren heziketa eta zertifikazio eskubidea duen Estatu Batuetatik kanpoko lehen enpresa izango da Zamudion dagoen institutua.

Metodologia honen bitartez software prozesu baten kalitatea neur daiteke, zuzendu eta hobetzeaz gain. ESI iaz hasi zen lanean eta software sektoreko enpresa europarrei laguntzea eta euskarria eskaintzea da bere betebeharrak.

Akordioa sinatuta, Kochen ustez ESI errazago sartuko da Latinoamerikako merkatuan.

Fagor Ederlan-ek 22.000 milioi fakturatuko ditu

M.A. / BILBO

Fagor Ederlan kooperatibak 22.000 milioi pezeta fakturatuko ditu aurtengo ekitaldia bukatzerako (880 milioi libera). MCC Arrasateko kooperatiben taldeko Automoziorako Osagaien Dibisioko partaide da Fagor Ederlan eta TPM (erabateko mantenimendu produktiboa) bikainari Japonian ematen zaion saria eskuratu du. Saria azaroaren 16an emango dute Tokion.

Japan Institute of Plant Maintenance (JIPM) erakundeak ematen duen sariak garrantzi handia dauka mundu osoko industria mailan, Fagor Ederlaneko iturriek azpimarratu dute-nez.

Kooperatiba saria eskuratu duen hirugarren enpresa europarra da eta Espainiako Estatuko lehena. Saridunen zerrenda aukeratuan daude baita ere Estatu Batuetako enpresa garrantzitsuenak eta Japoniako automobil ekoizle nagusiak, Toyota eta Nissan, esaterako.

TPM proiektuaren bitartez 1992. urtetik hona balio erantsia % 23 hasi da, matxurak % 40 murriztu dira eta lan istripuak % 30 jaitsi dira Fagor Ederlanen.

Toribio Etxebarria sarien finalistak aukeratuta

M.A. / BILBO

Enpresarako ideiak eta proiektuak saritzen dituen Toribio Etxebarria lehia-ketako finalistak aukeratu ditu Iñaki Arriola Eibarko alkatea lehendakari duen epaimahaiak.

Proiektuen atalean finalistak Elgoibarko Sisfle SA enpresak egindako Osagai Aeroespazialak lana, Eibarko Plastilux enpresaren Zisternen Estaldura lana eta Ermuako TVA sozietateak egindako Hub-lock proiektua izan dira.

Enpresarako ideien artean, berriz, Luis Javier Arrietak egindako CAR proiektua, Jose Javier Izquierdoren Aulki Gurgildunak egitasmoa eta TTT SAK landutako Planta Automatizatua izan dira aukeratutakoak.

Finalista hauen artean saridunak aukeratu ditu epaimahaiak.